

Nowa sezona w klósterskej zahrodźe wotewrjena

Pančicy-Kukow (SN/mwe). W Pančičanskim zežiwjenskim a zelowym centrumje su zawčerawšim lětušu sezonu wotewrěli. Po tradiciji sadžištaj starobiskop Drježdžansko-Mišnjanskeje diecezy Joachim Reinelt a abatisa klóštra Marijineje hwězdy Philippa Kraft njedźelu popoldnju w klósterskej zahrodźe štom lěta 2014 – čecikaty dub.

Lětuša sezona w přewšo krasnym a idyliskim arealu w Lipju je 20lětnemu jubilejej wobswětoweje a wuwučowanskeje zahrody wěnowana. Za to su přistajeni Miłočanskeho Křescansko-socialneho kubłanskeho skutka, kotryž centrum wobhospodarja, z dalšimi pomocnikami a partnerami nimo wupruwowaneho cyle nowej wobłukaj spřihotowali. W „hortulusu medicusu“ móža sej zajimcy hojenske rostliny wobhladać a zhonja tójšto zajimaweho wo jich skutkownosći. Pod heslom „słyšeć a widžeć“ zarjadowachu tež wočerstwjenki a kreatiwny blečk. Za džěći su nowy hrajkanski nastroj natwarili: napodobnjenu wěžičku klósterskeje cyrkwy. K jónkrótnej atrakciji słušeja tež zwukowe elementy, kotrež maja jako inspiracija přirodu z hudźbu zwjazac.

Zežiwjenski a zelowy centrum w Pančicach-Kukowje je daloko znaty a přiwabja kóžde lěto nimo šulskich rjadownjow, džěći a młodostnych a nimo domoródných tež syly turistow z tu-a wu-

kraja. Widžeć su tam přeco zajimawe wustajeńcy a prawidłownje organizuja w zahrodźe najwšelakoriše zarjadowanja a forumy. 25. meje w 14.30 hodź. wotměwa tam chór Lipa swój nalětni koncert.



Zapóslanc Sakskeho krajneho sejma Alojs Mikławsk (CDU), abatisa Philippa Kraft, starobiskop Joachim Reinelt a hromakowa princesna Melissa Zarjeńkec (wotlěwa) su w klósterskej zahrodźe nowu wustajeńcu ze skulpturami a fotami džěłarnički při Miłočanskim Krabatowym kamjenju wotewrěli. Foto: CSB